

Uunga siunnersuut: Aningaasanik peqquserluutinik malunnarunnaarsaasarneq pinerliiniarnernillu aningaasalersuisarneq pinaveersaartinniarlugit iliuserisassat pillugit Inatsisartut inatsisaata allanngortinneqarnera pillugu Inatsisartut inatsisaat
(Aningaasaqarnermut Naligiissitaanermullu Naalakkersuisoq)

Saqqummiussissut
(Aningaasaqarnermut Naligiissitaanermullu Naalakkersuisoq)

Siullermeerinnineq

Naalakkersuisut sinnerlugit aningaasanik peqquserluutinik malunnarunnaarsaasarneq pinerliiniarnernillu aningaasalersuisarneq pinaveersaartinniarlugit iliuserisassat pillugit Inatsisartut inatsisaanut allannguutissatut siunnersuut saqqummiuppara.

Ukiut kingulliit ingerlaneranni aningaasanik peqquserluutinik malunnarunnaarsaanermik allatullu aningaasanik pinerlunniarnernik akiuiniarnermik kiisalu aningaasanik nussuisarnerit saqquminerulernissaannik ataatsimut siunertaqartunik inatsisinut allannguutit arlallit suliarineqarput. Namminersorlutik inuussutissarsioertunut, aningaaserivinnut oqartussanullu piumasaaqatit sukaterneqarput, tamatumalu inatsisit malinnaasariaqarnerat malitsigaa.

Siunnersuut aningaasalersuisarnermut tunngasuni saqquminerulersitsissaaq peqquserlussinnaanermullu periarfissakinnerulersitsilluni. Inatsisissatut siunnersuut aningasanik pinerlunnernit allatulluunniit inatsisit unioqqutillugit pissarsiat Kalaallit Nunaanni malunnarunnaarsarneqarsinnaanerannik akiuiniartuussaaq.

Aningaasanik peqquserluutinik malunnarunnaarsaasarneq ineriartortuarpoq, inatsimmullu allannguutissatut siunnersuutigineqartut malittarisassanik nutarterinertaqarput, taamaalilluni taakku nunarsuarmi suliaaqqarfimmi ineriartornermut naapertuuttunngorsaanerullutik. Malittarisassat 2010-milli allanngortinneqanngillat.

Namminersorlutik inuussutissarsioertut aningaasat tigussaasunngorlugit akiliutit annertuut tigusinnaasaannut inerteqqut atorunnaartoq oqaatigineqassaaq. Namminersorlutilli inuussutissarsioertut 50.000 kr.-nik amerlanerusunilluunniit aningaasat tigussaasunngorlugit akiliutinik tigusinnaanerat suli inerteqqutaassaaq, tamannali peqqussut 2021-meersup malittarisassiaaniippoq¹. Inatsimmi uani inerteqqummik atorunnaarsitsinermi marloqiusamik inatsiseqarneq pinngitsoortinneqassaaq, siunissamilu Inatsisartut inatsisaata peqqussutillu akornanni naapertuutinnngitsoqarnerani inatsisip sorliup atuunneranik nalornisoqassanngimmat.

Suliffeqarfiit sullitaminnik kinaassusiinerat, aningasaallu amerlanerusut nuunneqarneranni suut siunertarineqarnerinik ilisimasarnissaat, aningaasanik peqquserluutinik malunnarunnaarsaasarnermik pinerliiniarnernillu aningasalersuineramik akiuiniarnermi

pingaaruteqarput. Siunnersuutikkut ilisarisimanninnissamik periutsinut piunasaqaatit erseqqissaavigineqarput.

Peqatigisaanik piginnittuiit kinaassuserneqarnerat annertusaavigineqarpoq. Inatsisartut 2021-mi ukiakkut ataatsimiinnerminni, 2022-milu upernaakkut ataatsimiinnerminni piginnittuiit pillugit peqqussutit arlallit allangortinneqarneri akuersissutigereerpaat. Inatsisissatut siunnersuummi uani allannguutit, allannguutinut taakkununga naapertuupput.

Taama oqaaseqarlunga Naalakkersuisut sinnerlugit siunnersuut Inatsisartunut kajumittumik oqallisigisassangortippara.

¹ Aningaasanik pequserluutinik malunnaarunnaarsaasarneq pillugu inatsimmik peqqussut nr. 956, 17. maj 2021-meersoq